

(Նոշիրակս առաքի զՉաքարիա վարդապետ և զԴաւիթ եպիսկոպոս).



Գերայգոյ ի գերակա եւ ի գերադրական ի գերահրաչ ի գերազանց և ի գերաճառ յամենասուրբ Երրորդութենէն, ի յանսկիզբն Հօրէն, ի յանհաս Բանէն, ի Հոգոյն ճշմարտէն, և ի միակութենէն և ի մի ընութենէն և մի գոյութենէն, և ի միապէս բարոյն, ի մի Աստուած գոլոյն, անձամբ և անուամբ բաժանելոյն, այլ ամենայնիւ մի կալոյն. Եւ ի գերազայ ի մեծաճամբաւ ի բազմալուր սուրբ մենաստանէս, ի Վաղարշապատու սուրբ աթոռոյս Էջմիածնա աստուածակազմ լուսոյս. Եւ ի սոցին սպասաւորէ ի Տէր Մելքիսէթ Կաթողիկոսէ ամենայն Հայոց, և ի Տէր Ստեփաննոս վարդապետէ, և ի Տէր Ստեփաննոս եպիսկոպոսէ, և ի Տէր Կարապետ վարդապետէ, և ի Տէր Յովհաննէս վարդապետէ. Նա և Ստեփաննոս արհի եպիսկոպոսէ, այլ և ի Զաքարիայ վարդապետէ, և յայլ միեղէն եղբարցս՝ որ աստ կանահաւագեալ ի Ս. Էջմիածինս. Հասցէ յիսուսաւանդ ողջոյն և առաքելական աւրհնութիւն ի վերայ տիրախնամ և աստուածապահ քաղաքացոյ. Նախ և առաջին Իլախաց երկրիդ մայրաքաղաքիդ Իլովա. եպիսկոպոսացդ, քահանայիցդ և ԲՃն (երկոտասան) Դատաւորացդ, և պարոն տօլվաթաւորացդ, և հաւասար քրիստոնէիցդ, մեծի և փոքու առ հասարակ. ամէն: Երկրորդ, Կամէնիսու քահանայիցդ և պարոն տօլվաթաւորացդ և հաւասար քրիստոնէիցդ. ամէն: Երրորդ, Սէշովու քահանայից և պարոն տօլվաթաւորացդ, և բովանդակ քրիստոնէիցդ. ամէն: Զորրորդ, Եաշու քահանայիցդ և պարոն տօլվաթաւորացդ, և հաւասար քրիստոնէիցդ. ամէն. եւ Ֆրանկաստանու քրիստոնէիցդ առ հասարակ ամենեցուն ամենայնի. ամէն:

Աւրհնեալ է Հայրն Աստուած անեղածին անժամանակ. գովեալ Որդին միածին Բանն Հաւր, ծագումն անճառ, լոյս և ճառագայթ. բարբերանեալ Հօգին Աստուած ճշմարիտ, բխումն անսպառ և բաշխօղ բարութեան. որպէս աւրհնեաց զդասս հրեշտակաց և զկաանս անմարմնոց, նոյն աւրհնութեամբն և զձեզ աւրհնեսցէ արարիչն Աստուած, զդասս և զգումարս ձեր, զազգս և զտոհմս ձեր, զարկս (զյարկս) և զկայանս ձեր, զտունս և զընտելութիւնս ձեր. Եւ որպէս աւրհնեաց զդրախտն Ադինեա և ի նմա զմարդն առաջին և զմայրն մեր